

Na osnovu člana 33. Statuta stonoteniskog saveza Bosne i Hercegovine i člana 34. Pravilnika o unapređivanju i usavršavanju stručnog rada u STS BiH, radu stručnih tijela Upravnog odbora Stonoteniskog saveza Bosne i Hercegovine, Upravni odbor Stonoteniskog saveza Bosne i Hercegovine na sjednici održanoj dana 29.09.2015. godine, donio je sljedeći

P R A V I L N I K
O STRUČNOM OSPOSOBLJAVANJU I LICENCIRANJU
STONOTENISKIH TRENERA U BOSNI I HERCEGOVINI

a) OPŠTE ODREDBE

Član 1.

Na osnovu prijedloga Komisije za unapređenje stonoteniskog sporta (Statut član 33.34.), Upravni odbor STSBIH u skladu sa odredbama Statuta STSBIH i odredbama Zakona o sportu, ovim Pravilnikom o stručnom osposobljavanju i licenciranju stonoteniskih trenera u Bosni i Hercegovini utvrđuje da je cilj ovog pravilnika da omogući:

- bolju edukaciju sportskih stručnjaka i stručnjaka u sportu,
- utvrđivanje zvanja i rangiranja u okviru strukovnog udruženja sportskih stručnjaka u stonoteniskom sportu,
- organizaciju seminara, tribina i stručnih rasprava s ciljem podizanja stručne osposobljenosti sportskih stručnjaka na željeni nivo koji je u skladu s planovima i ambicijama STSBIH.

Član 2.

Sve aktivnosti na stručnoj edukaciji i licenciranju stonoteniskih trenera vodi Predsjednik Komisije za stručnu edukaciju i licenciranje kojeg imenuje Upravni odbor STSBIH na prijedlog Predsjednika Komisije za unapređenje stonoteniskog sporta, koji je eminentni sportski radnik sa adekvatnim stručnim stonoteniskim obrazovanjem i koji je po svojoj funkciji i član Komisije za unapređenjen stonoteniskog sporta. Predsjednik Komisije za stručnu edukaciju i licenciranje predlaže Upravnom odboru još dva člana iz redova sportskih stručnjaka koji čine Komisiju. Ovim Pravilnikom utvrđuju se kriterijumi na osnovu kojih će se utvrditi ko, kada i pod kojim uslovima može steći određenu licencu kao sportski stručnjak u stonom tenisu kao i program rada strukovnog udruženja.

Član 3.

Ovaj Pravilnik se donosi kako bi se stručna pitanja u STSBIH uredila u skladu sa odredbama Zakona o sportu Bosne i Hercegovine (član 44.45.46) i Pravilnikom o nomenklaturi sportskih zanimanja i zvanja, a prilagođene trenutnoj situaciji u stonom tenisu koja se odnosi na kvalitet i stručnost trenerskog kadra.

b) DJELOKRUG RADA

1. Edukovanje sportskih stručnjaka i stručnjaka u sportu

Član 4.

Osnovna djelatnost Komisije za stručnu edukaciju i licenciranje je edukacija sportskih stručnjaka i stručnjaka u sportu u cilju podizanja kvaliteta rada i nivoa potrebnog znanja kako bi se na adekvatan način mogli ispuniti planovi i ciljevi koje je pred sportske stručnjake u stonom tenisu postavio UO STSBIH.

Edukacija sportskih stručnjaka i stručnjaka u sportu u stonom tenisu putem Komisije za stručnu edukaciju i licenciranje vršiće se permanentno tokom godine kroz:

- praćenje stručnog rada na treninzima klubova,
- praćenje i ukazivanje na nastupe naših igrača na takmičenjima u zemlji i inostranstvu,
- objavljivanjem stručnih publikacija na sajtu STSBIH kojima će se sportskim stručnjacima u stonom tenisu pomoći u stručnom napredovanju,
- aktivno angažovanje i pomoć u radu nacionalnih selekcija.

O ovom segmentu svog djelovanja Komisija za stručnu edukaciju i licenciranje obavezna je da podnosi izveštaje o radu Predsjedniku Komisije za unapređenje stonoteniskog sporta sa tačnim naznakama šta je od planiranog urađeno, a šta nije i sa preciznim navođenjem razloga zbog čega nešto nije urađeno.

2. Utvrđivanje zvanja i rangiranja u okviru strukovnog udruženja sportskih stručnjaka u stonoteniskom sportu – licenciranje

Član 5.

U skladu sa odredbama Zakona o sportu Bosne i Hercegovine 2008.godine i Pravilnikom o nomenklaturi sportskih zanimanja i zvanja Komisija za stručnu edukaciju i licenciranje vrši utvrđivanja zvanja i rangiranje sportskih stručnjaka putem izdavanja licenci u zavisnosti od stručnih kvalifikacija i kriterijuma predviđenih ovim Pravilnikom i Zakonom o sportu BiH.

Član 6.

Trenerske licence (dozvole za rad) izdaje Komisija za stručnu edukaciju i licenciranje, a mogu je dobiti samo sportski stručnjaci:

- koji su članovi strukovnog udruženja pri STSBIH ili organizovani u svoje strukovno udruženje,
- koji su državljani Bosne i Hercegovine
- koji su ispunili sve obaveze u pogledu stručnog edukovanja i prisustvovanja seminarima, kampovima i predavanjima u organizaciji STSBIH
- koji su platili članarinu i naknadu za izdavanje licenci.

2.1. Ovjera licence trenera – stranog državljanina

U slučaju da su državljani neke druge zemlje sportski stručnjaci obavezni su da prije izdavanja licenci Komisiji prikažu stručne kvalifikacije i biografiju. Na osnovu priložene dokumentacije Komisija za stručnu edukaciju i licenciranje može izdati trenersku licencu za jednu takmičarsku sezonu ili pozvati trenera stranog državljanina da polaže stručni ispit za ovjeru licence.

2. 2. Vrste licenci

Član 7.

Treneri mogu da dobiju jednu od sljedećih licenci:

- „A“ LICENCA
- „B“ LICENCA
- „C“ LICENCA
- „D“ – Privremenu licenca
- „TRAJNA LICENCA“

Pravo na trenersku licencu ima pojedinac koji zadovoljava jedan od uslova predviđenih za dobijanje svake licence, i to:

„A“ LICENCA

Trener koji je u svom školovanju stekao jedno od sljedećih akademskih zvanja:

- Doktor nauka iz oblasti sporta i fizičkog vaspitanja, disertacija iz oblasti stonog tenisa;
- Magistar nauka iz oblasti sporta i fizičkog vaspitanja - teza sa temom iz stonog tenisa;
- Master iz oblasti sporta i fizičkog vaspitanja – master rad sa temom iz stonog tenisa.
- Trener koji je završio Fakultet sporta i fizičkog vaspitanja sa diplomskim radom iz stonog tenisa i ima najmanje završen program stručnog usavršavanja (250 sati) – operativni trener stonog tenisa.
- Trener koji ima diplomu sa Visoke strukovne škole - usmjerenje stoni tenis.
- Trener koji je sa takmičarom ili ekipom osvojio jedno od prvih osam mjesta na takmičenjima (Olimpijske igre, Svjetsko prvenstvo, Evropsko prvenstvo) u seniorskoj konkurenciji ili klupsku šampionsku titulu u evropskim kupovima i ima najmanje završen program stručnog usavršavanja (250 sati) – operativni trener stonog tenisa.
- Trener koji je sa takmičarom ili ekipom osvojio jedno od prva četiri mjesta u kadetskoj i juniorskoj konkurenciji na Evropskom prvenstvu i ima najmanje završen program stručnog usavršavanja (250 sati) – operativni trener stonog tenisa.
- Pojedinac koji je kao igrač osvojio jedno od prva četiri mjesta na velikim takmičenjima (Olimpijske igre, Svjetsko prvenstvo, Evropsko prvenstvo) u seniorskoj konkurenciji (učestvovao na Olimpijskim igrama) i ima najmanje završen program stručnog usavršavanja (250 sati) – operativni trener stonog tenisa.
- trener nacionalne seniorske reprezentacije na EP, SP, OI, trener koji je kao glavni klupski trener „proizveo“ ili značajno utjecao na razvoj (min. 5 godina kontinuiranog rada s igračem) najmanje dva (kadetska, juniorska ili seniorska) reprezentativca, člana nacionalne momčadi na EP, SP, OI, i ima najmanje završen program stručnog usavršavanja (250 sati) – operativni trener stonog tenisa.

„B“ LICENCA

- Trener koji je završio Fakultet sporta i fizičkog vaspitanja, a nema diplomski rad sa temom iz stonog tenisa i ima završen program stručnog usavršavanja (250 sati) – operativni trener stonog tenisa.
- Trener koji ima diplomu Višeg sportskog trenera – usmjerenje stoni tenis.
- Trener koji ima diplomu Višeg sportskog trenera, a nema usmjerenje stoni tenis i ima završen program stručnog usavršavanja (250 sati) – operativni trener stonog tenisa.

- Trener koji je sa takmičarem ili ekipom osvojio od petog do osmog mjesta u kadetskoj i juniorskoj konkurenciji na Evropskom prvenstvu i ima završen program stručnog usavršavanja (250 sati) – operativni trener stonog tenisa.
- Trener koji ima završen program stručnog usavršavanja (250 sati) – operativni trener stonog tenisa i preko 3 godina rada u stonoteniskim klubovima.

„ C“ LICENCA

- Trener koji ima završen program stručnog usavršavanja (250 sati) – operativni trener stonog tenisa, a ima manje od 3 godina rada u stonoteniskim klubovima.

„ D“ – Privremena licenca

Privremena licenca se izdaje u sljedećim situacijama:

- Ako su treneri upisali jedan od nivoa stručnog usavršavanja trenera u obavezi su da u roku od 1 godine od izdavanja privremene licence dobiju diplomu.
- Ako su studenti Visoke strukovne škole za trenere i Fakulteta sporta i fizičkog vaspitanja u obavezi su da prije svake takmičarske sezone prikažu na uvid dokaze o uspješnosti školovanja.

„TRAJNA LICENCA“

- Treneri koji imaju preko 20 godina staža u stonom tenisu. Postizali su zavidne sportske rezultate s klubom ili pojedincem i doprinijeli svojim radom razvoju stonog tenisa u Bosni i Hercegovini (kao dokaz prilažu potvrdu od stonoteniskog Saveza Bosne i Hercegovine).

2.3. Ovjera i uslovi za obnovu licenci

Član 8.

Trenerske licence se ovjeravaju na početku takmičarske sezone. Da bi treneri stekli pravo na ovjeravanje licenci potrebno je da pored odgovarajućih kvalifikacija ispune sljedeće uslove:

- „A“ licenca - da učestvuju na seminarima u organizaciji komisije za stručnu edukaciju i licenciranje Stonoteniskog saveza Bosne i Hercegovine, pri čemu su obavezni da se pojave kao predavači ukoliko se ukaže potreba za njihovim angažovanjem.
- „B“, – da učestvuju na seminarima u organizaciji komisije za stručnu edukaciju i licenciranje Stonoteniskog saveza Bosne i Hercegovine
- „C“ – da učestvuju na seminarima u organizaciji komisije za stručnu edukaciju i licenciranje Stonoteniskog saveza Bosne i Hercegovine i seminarima u organizaciji entitetskih i kantonalnih saveza
- „D“ – Privremena licenca – da učestvuju na seminarima u organizaciji komisije za stručnu edukaciju i licenciranje Stonoteniskog saveza Bosne i Hercegovine i seminarima u organizaciji entitetskih i kantonalnih saveza, kao i da urade jedan seminarski rad na temu određenu od strane Komisije se stručnu edukaciju i licenciranje.
- „Trajna licenca“ – da učestvuju na seminarima u organizaciji STSBIH i kao predavači.
- Da plate naknadu za izdavanje licence. Naknada za izdavanje licence plaća se u jednokratnom godišnjem iznosu, a biće određena posebnom odlukom Komisije za stručnu edukaciju i licenciranje na koju Upravni odbor STSBIH daje saglasnost.
- Izuzetno od naprijed navedenog, ukoliko su sportski stručnjaci angažovani u radu nacionalnih selekcija ili drugim opravdanim razlozima spriječeni da prisustvuju seminarima, može im se izdati potvrda kojom će biti licencirani za narednu sezonu.

Član 9.

Svi treneri će na kraju seminara dobijati potvrdu o prisustvu na osnovu koje će se vršiti ovjera istih.

2.4. Licence i rang takmičenja

Član 10.

Sportski stručnjaci koji ostvare pravo na licencu za narednu takmičarsku sezonu mogu voditi ekipe u ligaškim takmičenjima, a ovim Pravilnikom određuje se rang takmičenja za koji važe pojedine licence: Za ligaška takmičenja su neophodne sljedeće licence:

„A“ LICENCA, „B“ LICENCA i „TRAJNA LICENCA“

- Premijer liga Bosne i Hercegovine
- Prva liga Bosne i Hercegovine
- Prva liga Federacije i Republike Srpske
- Regionalne lige

„C“ LICENCA i „D“ – Privremena licenca

- Prva liga Federacije i Republike Srpske
- Regionalne lige

Na pojedinačnim takmičenjima takmičare mogu voditi treneri sa svim izdatim licencama.

3. Organizacija seminara, tribina i stručnih rasprava

Član 11.

U cilju kvalitetne stručne edukacije Komisija za stručnu edukaciju i licenciranje organizuje pod pokroviteljstvom STSBIH i uz saglasnost Upravnog odbora STSBIH, a po prethodno pribavljenom mišljenju Komisije za unapređenje stonoteniskog sporta STSBIH seminare, tribine i stručne rasprave.

3.1. Seminari za sportske stručnjake i stručnjake u sportu

Član 12.

Osim objavljivanja stručnih radova na sajtu STSBIH Komisija za stručnu edukaciju i licenciranje posebno je obavezna da se angažuje na organizaciji seminara za sportske stručnjake i stručnjake u sportu. Seminari u organizaciji Komisije za stručnu edukaciju i licenciranje organizovaće se za sve stonoteniske sportske stručnjake i stručnjake u sportu u tačno utvrđenom terminu na sljedeći način:

- kroz organizaciju „Stonoteniskih trenerskih dana“ - obavezujući seminar
- kroz organizaciju entitetskih trenerskih dana (svaki region odrediće svoj datum održavanja)
- okupljanjem zainteresovanih sportskih stručnjaka na takmičenjima u organizaciji i nadležnosti STSBIH koji traju dva dana (topovi ili državna prvenstva) – fakultativno i u zavisnosti od interesovanja sportskih stručnjaka.

3.1.1. „Stonoteniski trenerski dani“

Član 13.

„Stonoteniski trenerski dani“ organizuju se uvijek krajem juna mjeseca i održavaju se u mjestu u kojem se vrše završne pripreme nacionalnih selekcija za evropsko prvenstvo mladih kategorija. Komisija za stručnu edukaciju i licenciranje obavezni su da obezbijede adekvatne kvalitetne predavače iz zemlje ili inostranstva, kako bi se stručni nivo znanja sportskih stručnjaka u našoj zemlji podigao na *viši nivo i postavili viši standardi u radu sa ekipama i pojedincima.*

Program „Stonoteniskih trenerskih dana“ Komisija za stručnu edukaciju i licenciranje obavezna je da početkom maja mjeseca tekuće godine dostavi Komisiji za unapređenje stonoteniskog sporta i Upravnom odboru STSBIH na usvajanje, a svim sportskim stručnjacima se program „Stonoteniskih trenerskih dana“ mora dostaviti najkasnije do kraja maja tekuće godine. Svi učesnici „Stonoteniskih trenerskih dana“ obavezni su da snose svoje troškove boravka i da plate kotizaciju za prisustvovanje na seminaru. Iz kotizacije Komisija za stručnu edukaciju i licenciranje može finansirati smještaj i naknadu predavačima koji nisu iz Bosne i Hercegovine, kao i izradu stručne literature koja će biti podjeljena ili naknadno dostavljena svim učesnicima seminaru. Komisija će sa ovaj seminar pripremiti stručnu literaturu kako bi se isti mogao što uspješnije pratiti, a snimljeni materijal sa demonstracijama i predavanjima dostaviće se sportskim stručnjacima na sljedećem seminaru kao stručni materijal.

Finansijski izvještaj Komisija za stručnu edukaciju i licenciranje obavezna je da dostavi Komisiji za unapređenje stonoteniskog sporta i Upravnom odboru STSBIH u roku od 15 dana od dana završetka seminaru.

3.1.2. Organizacija entitetskih trenerskih dana

Član 15.

Svaki entitet, unutar STSBIH ima pravo da putem svoje Stručne komisije organizuje trenerske dane na kojima će uz prethodno pribavljenu saglasnost UO Entitetskog saveza organizovati stručno usavršavanje sportskih stručnjaka u zavisnosti od potreba entiteta. Ova predavanja nemaju obavezujući karakter i nisu uslov za dobijanje trenerskih licenci, ali svaka Komisija za unapređenje stonog tenisa entiteta STSBIH ima pravo da na svoj način obezbijedi prisustvovanje na ovim trenerskim danima za sportske stručnjake iz svog entiteta.

3.1.3. Okupljanjem zainteresovanih sportskih stručnjaka na takmičenjima

Član 16.

Komisija za stručnu edukaciju i licenciranje na zahtijev sportskih stručnjaka i stručnjaka u sportu može organizovati i „ad hoc“ predavanja na takmičenjima koja traju više dana u organizaciji STSBIH, pri čemu je Komisija za stručnu edukaciju i licenciranje obavezna da kao predavače organizuje stručnjake koje zahtijevaju zainteresovani sportski stručnjaci.

Stručna predavanja na ovim takmičenjima bila bi tematska, može ih biti najviše dva, traju jedan dan i besplatna su za sve trenere koji imaju licence i redovno ispunjavaju svoje obaveze. Sportski stručnjaci obavezni su da zahtijev za organizaciju stručnog seminaru podnesu Komisiji za stručnu edukaciju i licenciranje najmanje 45 dana prije održavanja takmičenja na kojoj žele organizaciju stručnog predavanja.

ZAVRŠNE ODREDBE

Član 17.

Sva tumačenja odredbi ovog Pravilnika, njegove izmjene i dopune kao i usklađivanje sa opštim aktima STSBIH i zakonskim propisima u nadležnosti su Upravnog odbora STSBIH.

Član 18.

Ovaj Pravilnik stupa na snagu danom donošenja, a primjenjivaće se od 01.12. 2015. godine.

Predsjednik UO STSBIH
